



Senen, 18 Nopember 2024

Ogen: Kejadin 29:17



Matana Mejile



Adi lawes kita ku salon, salah sada bagin ayo si make waktu si cukup mbue ipekena-kena (isalon) e me mata. Subuk bedaki, itama eyeshadow, eyeliner, eyebrow, bulu mata ras sidebanna. Ngatakenca maka mata e sada bagin si cukup penting guna mpejile rupa ayonta. Emaka la sitik kalak si ngelakoken perawaten mata. Lit ka singatakenca maka janari kin rehna kekelengen, e me arah mata nusur ku bas pusuh. Si enda nudahken maka mata e muat peran si cukup penting bas kegeluhen. Lea anak Laban tuhu mejile matana. Bahasa Ibrani ikataken "rakowt" ertina *lunak, lembut, lemah*. Ertina maka mata Lea mereken daya tarik man kalak sideban. E jadi sada ciri-ciri kususna. Adi agina Rahel seh jilena potongen badanna, tapi lea matana tuhu mejile.

Sebage Moria, iajuk pe kita guna banci merawat matanta segelah tuhu mejile. Tentuna labo terjeng mejile man tatapen kalak sideban tapi lebih asa sie, banci mejile ka natap kalak sideban. Lit nande ngatakenca maka jagai matandu nakku, ula sempat kena pinakit mata e me: mata duiten, mata keranjang ras mata-matan. Mata duiten ertina duit jadi sukat-sukat kegeluhenna, mata keranjang: ertina enterem ingan nambat pusuh, ise pe banci atena ngena, la setia jelmana. Mata-matan ertina, la seri pengidah, lain nandangi bibi, lain ka perbahanen nandangi nande. Kerina enda perlu man jagan, segelah ula sempat seh ku pinakit si bagenda rupana. Guna sie perlu perawaten. Kata Dibata kap si banci mereken perawaten si mejilena, ijagaina dingen iajarina uga arusna makeken mata segelah tepat guna, maba kiniulin man dirinta ras kalak sideban, seh maka iidah kalak maka mejile kal matata.